

(1) Chitubu rudzii chinogara chiripo chinoratidza rudorwaMwari?

Mapisarema 19:1

Pane nzira zhinji dziri kushandiswa naMwari kuzviratidza kwatiri uye kutiswededza pedyo naYe. Zvaakasika zvinongogara zvichitaura kwatiri. Munhu ane mwoyo unogashira (pfungwa dzinonyatsoona zviripo sezvazviri), anonzwa achisundwa nerudo nembiri yaMwari sezvatinoiona ichiratidzwa kwatiri kuburikidza nebasa remaoko aKe. Nzeve inonyatsoterera inogona kunzwa nekunzwisisa Mwari achitaura kuburikidza nezvaakasika. Masango akasvibirira, miti mirefu, pfumvudza (nhenhere) nemaruva, makore anopfuurawo hawo nemudenga, mvura inonaya, netukova tunongo bwibwinyika kuseka tuchiyerera, zvese zvinongotaura rudo rweMusiki. Zvishamiso izvi zvedenga zvinotaura kumwoyo yedu nekutikoka kuti timuzive iYe akazviita zvole. Muponesi wedu aibatandiza zvidzidzo zvaKe zvinokosha zverudo achishandisa zvisikwa. Miti, shiri, maruva emumapani, zvikomo, makungwa, uye matenga anoyevedza,zvichisanganisira zvinoitika nezvinhu zvakatitenderedza mazuva ose zvaibatandizwa zvese mumazwi echokwadi. Zvidzidzo izvi zvinogona kudzoswa kupfungwa dzedu kunyange tiri pakati pekushingaira nemabasa edu. Mwari anoda kuti vana vake vaone kukosha kwezvhinhu zvaakasika. Uye anodawo kuti vafadzwe nezvinhu zviri nyore, uyewo runako rune kunyarara rwaakashandisa kushongedza musha wedu werino pasi. Mwari anoda zvinhu zvinoyevedza, asi kupfuura runako rwekunze anofarira runako rwechimiro. Chidiso chaKe kuti isu tive vakachena pamoyo uye vanhu vari nyore serunako rwakanyarara runowanikwa mumaruva.

(2) Mukati mehupenyu hwedu hwakazara nekushingaira, tinganzwe sei Mwari achitaura kwatiri kuburikidza nezvaakasika?

Mapisarema 4:4, 5

Kana tikangoterera bedzi, zvakasikwa naMwari zvichatidzidzisa zvidzidzo zvinokosha pamusoro pekuterera nekuvimba. Tinoona kuti zvisikwa zvinoterera zvidiso zvaKe, kubva kunyeredzi nguva dzose dzinofamba nenzira dzadzakatarirwa kusvika kukanhu kadikidiki zvinoteedzera mutemo waKe.

(3) Mwari anoratidza sei kuti chisikwa chese chinokosha kwaari?

Mateo 10:30

Mwari Musiki ane hanya nezvinhu zvole. Iye akateya nyika dzisingaverengwi muchadenga, ane hanya nekashiri kaduku kanozviiimbirawo hako. Patinobuda kunoita mabasa edu, patinonamata, patinorara usiku, patinomuka mangwanani, panodyiwa zvakanaa nemupfumi muutefetefe hwezimba rake, kana panoungana murombo nemhuri yake vachidya tushoma twavainatwo, mumwe nemumwe anenge achichengetwa nekuriritirwa zvinehanya naBaba vedu vari kudenga. Hapana musodzi unodonha kana nyemwerero inopfuura, vasina kuzviona.

(4) Patinosvika pakuziva Mwari nekuisa vimbo yeupenyu hwedu hwese mumaoko aKe tichava vakachengeteka zvakadii?

VaRoma 8:28

Tikatenda mashoko aya nemwoyo wose, zvinotibatsira kusiyana nekufunganya. Kana zvinhu zvole, zvikuru nezvidiki, zvikasiwa mumaoko aMwari, upenyu hwedu hauzozari nekukuhunika. Iye haashamiswi nematambudziko edu mazhinji, haakundwi nezvinotiremera. Tikanzwisisa izvi tinogona kuva nerugare rwemwoyo rusina vazhinji.

(5) Zvaakasika zvinoratidza sei rudo rwaMwari?

1 Vakorinte 2:9



Apo pfungwa dzedu, maziso nenzeve zvinodakadzwa nezvakanaka nezvinoyevedza zverino pasi, funga pamusoro penyika iri kuuya. Nyika inouya haizofi yakaziva zvakaitwa nechitema nerufu, uye zvisikwa zvayo hazvizofi zvakapfeka mumvuri wechituko chacho. Mupfungwa dzako edza kuona musha weavo vachaponeswa uyewozve rangarira kuti uchange wakanaka kupfuura zvaungamborota. Muzvipa zvakasiyana-siyana zvatakapihwa naMwari mune zvaakasika tinogona kungoona nechekure-kure kana zvishoma-shoma kubwinya kwembiri yaKe.

Nyanduri nemudzidzi wezvisikwa vanogona kutaura zvakawanda pamusoro pezvakasikwa, asi Mukristu ndiye chete anogona kudakadzwa nerunako rwenyika aine kuyemura kukuru. Anoona basa remaoko aBaba vake uye anoona rudo rwavo mumaruva, zvikwenzi uye nemiti. Hapana anokwanisa kuyemura zvizere zvakamirirwa negomo kana nebani, rwizi kana gungwa, kunze kwekunge achizviona senzira iri kushandiswa naMwari kuratidza rudo rwaKe kumunhu.

(6) Patinosvika pakunyatsoziva Mwari zvidzidzoi zvichanyatsotijekera?

Mapisarema 33:5

Mwari anotaura kwatiri kuburikidza nenzira yaanoshanda muhupenyu hwedu uye kuburikidza nekushanda kweMweya waKe pamwoyo yedu. Muzviitiko zvehupenyu hwedu uye mune zvakatitenderedza, mushanduko dzese dzinoitika zuva nezuva pane zvakatitenderedza, tinogona kuwana zvidzidzo zvinokosha kana mwoyo yedu yakazaruka kuti izvione.

(7) Seiko hupenyu hwevatendi vekare nevaporofita zvakanyorwa muMagwaro?

VaRoma 15:4

Mwari anotaura kwatiri kuburikidza neShoko raKe. Mariri tinoisirwa pachena chimiro chaKe. Tinoratidzwa mashandiro aKe nevanhu, uye pamusoro pezano raKe rekutidzikinura. Maari (Magwaro) tinoratidzwa nhorooondo yevatendi vekare nevaporofita, nevamwe vatsvene vakare. Vaiwavo vanhu “vakaita sesu.” Jakobo 5:17. Tinoona kunetseka kwavaiita nenguva dzakaoma dzakafanana nedzeduwo, uye pavaiputsika nekuda kwemiyedzo sezvatinongoitawo. Tinogonawo kuona kukunda kwavakaita kuora mwoyo vakawanazve kukurira kuburikidza nenyasha dzaMwari. Patinoona izvi, nesuwo tinowana kukurudzirwa mukutsvaga kwedu kururama. Tinoverenga zvidzidzo zvinokosha zvavakapihwa, chiedza, rudo nezvikomborero zvavakanakirwa nazvo, uye basa ravakagona kuita kuburikidza nenyasha

dzavakapihwa. Patinoona zvinhu izvi mweya waivafemera unobatidza murazvo wezvishuwo zvinoyera mumwoyo yedu. Tinonzwa kuda kufanana navo muzvimiro uye kufamba naMwari sezvavakaita.

(8) Tinowana zvikomborero zvakakosha zvakadii zvatinozarurirwa mukudzidza Magwaro?

John 5:39

Jesu akataura pamusoro peMagwaro eTestamente yeKare achiti, “Ndiwo anondipupurira ini.” Uyewo ndizvo zvakaita Magwaro eTestamente itsva. Hongu Bhaibheri rese rinotitaurira pamusoro paKristu Mudzikinuri; iYe ari musana wetariro dzedu dzeupenyu husingaperi. Kubva kuchinyorwa chekutanga chekusika,nokuti “Kunze kwaKe hakuna kuitwa kunyange chinhu chimwe chakaitwa”, kusvikira kuvimbiso yekupedzisira, “Tarirai, ndinokurumidza kuuya,” tiri kuverenga mabasa aKe nekuterera kuizwi raKe. Johane 1:3; Zvakazarurwa 22:12. Kana uchida kusvika pakuziva Muponesi, dzidza Magwaro Matsvene.

(9) Seiko kudzidza kuziva Mwari kuburikidza neMagwaro kwakakosha zvikuru?

Johane 6:63

Zadza mwoyo wako wese nemashoko aMwari. Iyi ndiyo Mvura yeupenyu inogona kupedza nyota yako huru. Ichi ndicho chingwa chipenyu chinobva kudenga. Jesu anoti , “Kana musingadyi nyama yoMwanakomana womunhu, nokunwa ropa rake, hamuno vupenyu mamuri.” Johane 6:53. Miviri yedu inovakwa nezvatinodya nekunwa, saka zvatinoisia mairi zvine chekuita neutano hwemiviri yedu. Ndizvo zvazvakaitawo pautano hwemweya. Zvatinotora nguva yedu tichiita, kuona, kunzwa nekufungisisa ndizvo zvinovaka nekusimbisa upenyu hwedu hwemweya.

(10) Idingindirai rinoshamisa reBhaibheri ratinofanira kutora nguva tiri pariri?

1 Vakorinte 2:2

Nyaya yeruponeso inyaya inodiswa zvikuru nengirozi kuti dziiongorore. Ndiyo ichava chidzidzo nerwiyo rweavo vanenge vaponeswa munguva yese yeupenyu husingaperi. Hazvikoshi here kuti titore nguva tichifungisisa nekudzidza nyaya iyi iye zvino? Tsitsi dzisingaperi nerudo rwaJesu, kuzvipira kwaAkaita nokuda kwedu, madingindira aya anokosha zvakadaro zvekuti anofanira kupihwa nguva yekufungisiswa pamusoro pawo. Tinofanira kufunga pamusoro pechimiro cheMudzikinuri neGweta redu rinodikanwa. Tinofanira kufunga pamusoro pechinangwa cheUyo akauya kuzoponesa vanhu vake kubva muzvivi zvavo. Patinofunga pamusoro pechokwadi ichi chedenga, kutenda kwedu nerudo rwedu zvinokura nekusimbiswa. Minamoto yedu inozonyanyawo kuva inofadza pamberi paMwari; inobva yanyatsosangana nokutenda nerudo; inova minamoto ine njere uye ine kurevesa. Panova nekuvimba kusingaperi muna Jesu, uye kudyidzana naYe kwechokwadi mazuva ose musimba raKe “rekuponesa kwazvo kwazvo vose vanouya kuna Mwari naYe.

(11) Zvinhu rudzii zvinosimbisa zvimiro zvedu?

VaFiripi 4:8

(12) Patinofungisisa pamusoro pehutsvene hwaMwari, chidisoi chichazadza mwoyo yedu?

1 Vakorinte 15:49

Patinofungisisa pamusoro pekuperera kwaJesu, tinozonzwa tichida kushandurwa zvachose nekuitwa vatsva muchimiro chaKe chisina chachingapomerwa. 2 Vakorinte 3:18. Muchava nenzara nenyota mukati medu yekuda kuva saJesu, uyo watinoyemura.

Kana pfungwa dzedu dzanyanya kugara pana Jesu zvinozoita kuti chidiso chedu chikuru chekutaurira vamwe nekufungisisa pamusoro pechimiro chaKe.

(13) Ko Shoko raMwari rakambonyorerwa ani?

Mapisarema 19:7

Shoko raMwari harina kumbonyorerwa vakadzidza zvikuru, kwete, asi rakatonyorerwa vanhuwo zvavo. Zvokwadi huru dzaro dzakaiswa pachena sezuva. Hapana angaita mhosho kana kurasika kunze kweavo vanoteera kusarudza kwepfungwa dzavo panzvimbo yekuteera zvidiso zvaMwari zviri pachena zvinoratidzwa muShoko raKe.

(14) Seiko kuzvidzidzira Shoko raMwari kwakakosha?

2 Timotio 2:15

Hatingofaniri kungoterera zvinotaurwa nevamwe vachitiudza kuti ndizvo zvinodzidziswa neBhaibheri, asi tinofanira kuzvidzidzira Shoko raMwari pachedu. Tikabvumidza vamwe kuti vatifungire tichava nezvidiso zvakaneta, uye kukwanisa kushoma. Masimba edu makuru ekufunga anogona kugomadzwa nokusashandiswa mupfungwa idzo dzinokosha kusvikira tarasikirwa nekugona kwedu kubata zvakadzika zveShoko raMwari. Pfungwa dzinosimbiswa apo dzinodzidza nyaya dzeBhaibheri, dzichienzanisa magwaro nemamwe magwaro, uye zvemweya nezvimwewo zvinhu zvemweya. Hapana chinosebisa pfungwa kupfuura kudzidzwa kwemagwaro. Hakunazve rimwe bhuku rine simba rekusimudzira pfungwa uye kupa simba mukudzamisa kwekugona kwedu, kupfuura zvokwadi dzinosimudzira dzeBhaibheri. Kana tikadzidza Shoko raMwari sezvatinoanira tinozova nekufunga kwakazara, ukuru hwechimiro uye kugadzikana kwechinangwa kusati kwamboonekwa munguva dzino.

(15) Madzidziroi achanyanya kutibatsira zvikuru?

Mapisarema 119:11

Tikaverenga magwaro tichimhanya-mhanya, hapana zvizhinji zvatinowana kubva mukuaverenga. Mumwe anogona kuverenga Bhaibheri rose asi agotadza kuona runako kana kunzwisisa zvakadzika nezvakavanzika zviri mariri. Kana vhesi rimwe chete rikadzidzwa kusvikira kukosha kwaro kwajeka kupfungwa dzedu uye kusvikira tanzwisisa ukama hwaro nezano rekutiponesa, zvinokosha kupfuura kuverenga zvitsauko zvizhinji zvisina chinangwa mupfungwa uye zvisina uchenjeri hwatawana. Gara uine Bhaibheri rako uye nguva yaunenge wawana verenga uyedze kubata nemusoro zvimwe zvikamu kana mavhesi eBhaibheri. Kunyange uchizvifambira hako munzira unogona kuverenga vhesi wofunga pamusoro paro, mukuita izvi unenge uchitoritsimbidzira mupfungwa dzako.

(16) Kudzidzwa kweBhaibheri kunoitwa zvakadii?

Isaya 28:10

Hatigoni kuwana uchenjeri pasina kushingaira kukuru nekudzidza kune munamato. Zvimwe zvikamu zveMagwaro zviri pachena hazvigoni kuti munhu atadze kuzvinzwisisa, asi kune zvimwe zvinetsananguro dzisiri pachena pekuti dzinongokurumidza kuwanikwa. Magwaro anofanira kuenzaniswa neMagwaro. Tinofanira kunyatsodzidza vhesi rimwe nerimwe zvine hanya uye nemunamato tichifungisisa pamusoro paro. Kana izvi zvikaitwa tichakomborerwa zvikuru. Semucheri wemigodhi anowana tsinga yechicherwa chinokosha yakavigwa pasi pevhu, uyo anoramba achitsvagurudza Shoko raMwari, semunhu anotsvaga pfuma yakavanzwa, anowana zvokwadi yakakosha zvikuru, vanowana zvokwadi isingawanikwi navanongoitsvaga vasina hanya. Mashoko akafemerwa aya, akafungisiswa nezvawo anozoita sehova dzinoerera kubva pachitubu cheupenyu.

(17) Seiko munamato uchikosha tisati tatanga kuverenga Magwaro Matsvene?

Jeremia 33:3

Bhaibheri harifaniri kutomboverengwa pasina munamato. Tisati tazarura mapeji aro tinofanira kukumbira Mweya Mutsvene kuti azarure pfungwa dzedu kuti tigone kunzwisisa uye izvi zvinoitwa. Pakasvika Natanieri kuna Jesu, Jesu akati, “Tarirai muIsraeri wazvokwadi, usino kunyengera maari!” Natanieri akati, “Mandzivirepiko?” Jesu akapindura, akati kwaari: “Firipo asati akudana uri munyasi momuvonde, ndakakuvona.” Johane 1 : 47, 48. Jesu achationawo munzvimbo dzedu dzakahwanda dzemunamato kana tikakumbira njere dzokuziva kuti chokwadi ndechipi. Ngirozi dzaMwari dzichava neavo vanozvininipisa vachitsvaga kutungamirwa naMwari.

(18) Chokwadi chinozarurwa sei?

Johane 16:13

Mweya Mutsvena anosimudzira nekuunza mbiri kuna Muponesi. Chinangwa chaKe chekutiratidza Jesu, kuperera kwekunaka kwaKe, uye chipo chaKe chikuru cheupenyu chatinowana kuburikidza naYe. Jesu anoti, “Uchatora pane zvangu akakuparidzira izvo.” Mweya Mutsvene uyo ari Mweya wazvokwadi ndiye Mudzidzisi oga akakwana wezvokwadi yedenga. Mwari anofanira kunge achitida zvikuru kuti atipe Mwanakomana waKe kuti atifire uye kutitumira Mweya waKe kuti ave Mudzidzisi uye Nhungamiri yedu.

Ndinoshamiswa kuti Mwari anondida zvakadaro zvekuti dai ndakanga ndirini mutadzi ndega, angadai akatuma Mwanakomana waKe kuzongondifira ini ndega.

Tenderedza:	Hongu	Kwete	Handisati ndasarudza
--------------------	--------------	--------------	-----------------------------

Ndinotenda Mwari nokuti akapa Shoko raKe kuti rindibatsire kumuziva zviri nani. Ndiro chitubu changu chehuchenjeri uye rinoratidza nzira yandingawana nayo upenyu husingaperi.

Tenderedza:	Hongu	Kwete	Handisati ndasarudza
--------------------	--------------	--------------	-----------------------------

MuShoko raMwari ndinowana kudzidza, kutsungirira, kunyaradzwa uye taro. Ndinomukumbira kuti andipe chidiso chikuru chekuriverenga kuti ndivige chokwadi chaKe mumwoyo mangu kuti ndirege kumutadzira.

Tenderedza:	Hongu	Kwete	Handisati ndasarudza
--------------------	--------------	--------------	-----------------------------

Ndinonamatira kuti Mweya Mutsvene ave Mudzidzisi wangu nekundipa mwoyo unozvininipisa. Ndinonamatira uchenjeri kuti ndigokwanisa kuisa mutsara pamusoro pemutsara uye chirevo pamusoro pechirevo uye kunzwisisa chokwadi.

Tenderedza:	Hongu	Kwete	Handisati ndasarudza
--------------------	--------------	--------------	-----------------------------

Chinangwa changu kutsvaga Mwari nomwoyo wangu wose nepfungwa dzangu dzose uye nemweya wangu wose. Chidiso changu kunzwa kutungamira kwaMweya Mutsveve kuitira kuti nditeere chiedza chinoratidzwa neMagwaro panzira yehupenyu husingaperi.

Tenderedza:	Hongu	Kwete	Handisati ndasarudza
--------------------	--------------	--------------	-----------------------------

(C) Merlin Beerman - www.revelationpublications.com
Illustrations (C) Goodsalt - www.goodsalt.com
These materials may be photocopied and shared but not altered or sold.

Printed in USA by Light Bearer’s Ministry - www.lbm.org

Matsiko Kuna Kristu



Kudzidza Zvakati Wandei Pamusoro PaMwari